

## **KTHEHU...!**

### **POEZI- KADRI GËRVALLA**

Të kam thënë kthehu

Se dheu po loton!

Të thirra të më shohësh edhe njëherë,

Të prita te përroi, s'erdhe veç uji nga gurra dilte.

Tash nuk do të më gjesh mua, as bacën,

As Donin, as Blertën, as nusen...

Nuk do ta gjesh as qenin te dera,

Të gjithëve na mori plumbi si era.

Amanet nga nëna: kthehu e kërkoi eshtrat

Nëse mund t'i gjesh.

Kur të vish në fshat

Mos u habit nga tmerri!

Këtu biro, luftë ishte, luftë, luftë...

Në oborr kur të hysh, qeni nuk del përpara,

Ishte besnik, mysafirët gjithmonë i ka pritë.

E vranë se lehu shumë, shkaun se lente në oborr.

Një plumb qe mori, nuk lehu më,

Mbas derës së oborrit eshtrat ia gjen

Mbuloje me dhe se e ruajti pragun...

Në odë bacën nuk e gjen ,

Veç kapuçin e bardhë mbas koftorit ja gjen

E morën me zor nga oda.

Kërkoja eshtrat te Llapi, atje te mulliri,

Mbuloje me dhe se të deshi shumë.  
Odën nuk deshi ta lëshojë, se aty ka pleqnue  
Baba, babagjyshi dhe katragjyshi i tij.  
As Donin e Blertën nuk e gjen,  
Kërko abetaren te qershia,  
Ishin duke mësuar abecenë!  
Nusja doli para plumbave t'i mbroj fëmijët  
I vranë te tretë, te pema e qershisë,  
abetarja mbeti hapur...  
Mbuloi me dhe nusen dhe fëmijët,  
Qaj sa të mundesh se vdiqën duke mësuar  
Të madhen ABETARE...  
Mua, lokes më kërko te përroi  
Eshtrat i gjen pas dudës dhe pas arrës  
Katër shkie i vrava loke, me atë pushkën  
Që e blemë kur e shitëm larën...  
Katërdhjetë shkije gjuajtën mbi mua  
As një plumb nuk më rroku.  
Mbulomë me dhe, Kosovë biro, si mjaltë është.  
Shpirti me doli duke të pritur te përroi,  
Sytë çelë më kanë mbetur,  
Atë kam dhënë kthehu biro...  
Kthehu e mos ik më kurrë.